



QUÆSTIO MEDICA

QUODLIBETARIIS DISPUTATIONIBUS

MANE DISCUTIENDA

IN SCHOLIS MEDICORVM,

Die Jovis 8. Januarij.

M. FRANCISCO VEZOU

DOCTORE MEDICO, CONSILIARIO

& Medico Regis ordinario, Præsides.

An Quibus ingenij vis major; minor est corporis?

I.

STEMMATA quid faciunt? Homini homo plurimum præstat. Et licet iisdem principiis constet: principibus à naturâ aliqui dotibus insigniuntur, quibus suprà cæteros mortales erecti, velut innatâ dignitate principatum habent. Tanti discriminis causa non cælum, non sydera, non animarum disparitas. A seminum temperie, miscellâ, varioque motu tota futuri hominis existit nobilitas atque felicitas. & quò plures vel pauciores condet virtutes imò sinu fœcundum germen: eò dabit prolem magis aut minus spectabilem. Hanc hominis ab homine discrepantiam diversâ constituere possunt genera virtutum quibus singuli singulariter incalescunt. At ea maximè conspicua dissimilitudo est in iis qui viri:

bus ingenij præstant; quales in Lycæo quondam fuere Philosophi. Et in iis qui viribus corporis excellunt; quales in Palestinâ visi sunt olim Athletæ. Felix quem nascentem natura sive corporis sive animi bonis illustrioribus illis exornavit. An cum Platone tamen alterutrius participem sortis jure vel injuriâ χαλόν vocabimus.

I I.

ROBUR duplex. Alterum partis unius: alterum corporis universi. Robusta pars est quæ intrâ limites innatæ temperiei posita suum ritè pensum absolvit. Robustum corpus quod exercitij vehementioris, aut improbi laboris patiens est. Alterutri sustinendo pares cuncti non nascimur. Piruitosi somno graviter; frigidè laboribus indulgent. Biliofi παμυδαχον inchoant ardentiore studio: languidiore claudunt. In medio cursu melancholici deficiunt. Solus sanguineus Pancratiastes, imò & nobilis Quinquertio. Calor in illo multus quo vires integre diu foventur: ruituræ statim recreantur. Sanguis uberior quo musculorum fibræ reguntur, tenduntur, irrigantur. Spiritus copiosissimi qui per nervorum tubulos sinè ullâ intermissione decurrunt: atque hi cum sint substantiæ crassioris non ita facile tenues evanescent in auras. Hinc in operibus arduis patientia, hinc constantia. Inter sanguineos qui corporis proceritate vincit; pectore non vincit. Δόσιον referet qui statura mediocris erit. Qui non pinguis, sed εὐσπαρής. Cui pilus durior, non copiosior. Cutis aspera. Nervi crassiores. Ossâ solidiora. Ligamenta sicciora. Firmiora latera. Pectus latum & amplum.

I I I.

NON est hujus soli: nec à sole excisa particula animæ rationis compos. Clarioris originis est forma princeps. Qui cum temperamento eam confundunt; humilius de eâ sentiunt. Crassipellis philosophus est qui à sanguine aliam non esse putat. Hæc omnis experta materiæ cum corpore mirè coit quod intimè præsens suo quasi numine mover agitque. Quotquot in humano corpore eliciuntur actiones huic uni acceptæ referendæ sunt. Frustrâ facultates fingunt varias omnium operationum principia. Ipsa anima est quæ suis usæ organis velut è divite gremio tot miracula profert. In vasis nutritiis alimentum universo corpori adornat: adornatum per venas

arteriasque defert quo partes affatim omnes expleat provida nutritrix. In capite quæ sua verè sunt munia exequitur. Apprehendit, intelligit, recordatur. Hoc triplici munere quò quisque feliciùs defungitur: eò felicioris est ingenij. Hic *ἀντιδωκτ* literarum semina menti mandabit; quæ postmodum uberius reddet. Hic in variarum artium redundabit elegantiam, & quæcumque professus fuerit in eâ excelleret. Hic de rebus explicatè abundanter & illuminatè dicet. Hic nimios animi motus rationi non obtemperantes dominâ ratione sedabit. Hic solers sagaxque fortunam & fata reget.

I V.

INGENII felicitas, summa felicitas est. Ad eam acquirendam literarum studia, temperantia, selectorum alimenterum usus valdè juvant. Sed nihil inuitâ naturâ perficies; aut certè parùm proficies. Ut non omnis fert omnia tellus: sic non omnis temperies apta mentis functionibus insigniter obeundis. Quæ ex biliosi & melancholici succi mistione subnascitur: hæc egregia & regia. Maximè si nervorum tenuitas, cutis lævitas, & cerebri mollior substantia comes adsit. Sic à naturâ affectis nihil deest eorum quæ ad ingenij præstantiam requiruntur. Habent à bile mentis acumen: à melancholico humore iudicium & memoriam. Ab utroque succo spiritus generantur subtiliores, admodum tersti ac nitentes quorum ad opera mentis utilitas est atque necessitas maxima. Molle cerebrum quoquo versùs à spiritibus facillè pervaditur: in eo res objectæ citiùs imprimuntur. Cutis lævitas eo ingenium juvat, quod plura recrementa sinat elabi quibus ejectis sensus in opus quique suum liberiores incumbunt. Nervi tenuiores quemadmodum funiculi pulsati citiùs resonant. An ideo non nulli quibus in dorso tubera contingunt quod delicati nervi, ligamenta teneriora continere simul vertebras nequeant? Illustri sunt ut plurimum ingenio.

V.

FOEDUS nullum esse potest virium corporis cum nervorum mollitiæ, lævitate cutis, spirituum tenuitate. Qui robore prior esse cupit, is Pugilum habitum liberaliore victu sibi comparare debet. At ingenio præstantes viri adipe nimio mentis aciem obtundi nullatenus patiuntur. Hi siccio-

res (ξυπολωφότεροι) miserè nutriuntur. Vorax in illis cerebrum est, quod tanquam publicanus in opes reliquorum artuum invadit. Mens perpetuò mota licet immota spirituum familiam funditùs evertit. Hinc musculis ad motum ferè nulla vis: nulla brachiis ad amplexum: nulla pedibus ad incessum. In oculis ingeniosi plus emicat ignis quam in subjectis omnibus partibus. Vix satis habent flammæ vitalis viscera quâ ingestum alimentum conficiant. Hanc à laribus patriis ad caput measse crederes. Trahuntur in ruinam partium nutritioni dicatarum partes generationi inservientes. Hæ miseræ inopes sinè spiritibus, semen si quod effundunt frigidum humidum est: liberis ineptis apta creandis materies. Ac quoniam contentionibus animi quibus summis uti solent ingenij singularis homines; plus deperditur spirituum quam refarcire aliquando natura possit: gravibus sæpè morbis tentantur illi quorum magnitudine victi antè diem acerbo funere merguntur.

Ergò Quibus ingenij vis major; minor est corporis.

DOMINI DOCTORES DISPUTaturi.

M. Carolus Marteau.

M. Antonius le Moine.

M. Guido Crescentius Fagon

Familia Regina Medicus.

M. Iacobus de Bourges.

M. Petrus Legier.

M. Nicolaus Robin.

M. Ioan. Bap. Moreau, Prof. R.

M. Eusebius Renaudet.

M. Isaac Renaudot.

Proponebat Lutetiæ PETRUS OZON, Argimontensis
Baccalaureus Medicus, A. R. S. H. MDCLXXI.

PARISIIS,

Ex Typographia FRANCISCI MUGUET, Regis &
Illustrissimi Archiepiscopi Typographi,
viâ Citharæ.